

1 YON

Yon nakalelel let towen waseg silawun siwayoub, o kamnat, o mwamovads nag beikous.

Livan silmanin mwamov

1 ¹⁻³Wanamug mwamov livanen son Tamads nisesus. Wankuyeim yakamey watigem bo kaligen gamag towen; mitem kakin; nimem kakabkwen; peinan bo ikamat wadaban pwepway. Bo kakin mo kakamat kadibakeimiy livanen mwamov nag beikous; peinan gamag towen son Tamads nisesus mo ikamat wadaban pwepway. Nakakin kadibakeimiy, vagan bitamsamwas babaw yakids, peinan sidayas Tamads son Natun Yeisuw Kelis.

⁴Let towen nalel neiw kuvinis, bukumwasaws sigwey yakimiy, mo bivakaein idamwasaw babaw yakids.

Yowbad kamnat tonen

⁵Anilivan towen bwanabwein nakaligen, mo kadibakeimiy mamagina: Yowbad kamnat tonen. Nag kweitan dadub sinap Yowbad waseg.

⁶Kukin bitalivan, “Tamsamwas sod Yowbad”, tage adsinap dadub, mogo tayyaweid yakid; peinan sinap moundid tapiyev.

⁷Kukin gog amasinap kamnat, mamagina towen ansinap kamnat, mo tamsamwas sidsidayas wasigeis, peinan Yeisuw buyavin iwidiwid adsinaps kalbaleb biyakous.

⁸Kukin gog bitalivan, talana, “Nag ivag adsinap kalbaleb”, mamagina takatidev nanoud tatoneid; peinan nag ivag sinap moundid wasigeis yakid, nag.

⁹Kukin bitakamtel adsinap kalbaleb, Yowbad biwid bilev, mo beikous. Peinan ansinap didumwal, itoukum wotet towen silmanin.

¹⁰Kukin gog bitalivan, “Nag ivag adsinap kalbaleb”; mamagina talana, “Yowbad tayyaweid”. Bitalivan mawan, nag beivag ansinap wasigeis yakids.

Kelis veiyouds yakids

2 ¹Nitug yakamity, bo nalel millet towen vagan nag beivag amisinap kalbaleb. Kukin teitan bikalouw, o bivag ansinap kalbaleb, veiyouds

nises, tadidumwal; mtowen Yeisuw Kelis ininitoug peinads yakids, vagan Tamads biwid adsinaps kalbaleb.

²Mtowen lun bulukwan peinan sinap babaw kalbaleb, adsinaps yakids, sidayas ven babaw gimgilis.

³Kukin bitavnases nakaleiwag mo bitakakins moundid veiyouds towen.

⁴Kal yak bukulivan, “Akakin veiyoug towen,” tage nag bukuvnas nakaleiwag, singay tayyaweid yak.

⁵Tage kukin bukuvnas aygan, mo bukusiwayoub beibwein, mawan Yowbad bo isiwayoub. Mapuna bitakakin angamag tonen yakid.

⁶Kal yak bukulivan, kulana, “Soug Kelis kasesuna,” kadiloka beivag amsinap mawana Kelis ansinap tonen.

Kaleiwag kweivaw

⁷Sigwey, kaleiwag kweivaw nag basekeimiy. Misinaka balel kaleiwag nises kweiboug wasigeis yakids. Livan towen nukuliganes.

⁸Kweivaw mo balel kaleiwag towen pinamiy yakamiy. Anagin kaleiwag towen moundid ikamat waseg Kelis, o wasigeis yakids, peinan dadub bo ikous, kamnat moundid mo imteilids.

⁹Kal yak bukulivan, kulana, “Yey agusinap kamnat,” tage bukwamliw soum, adok igaw tadadub yakoum.

¹⁰Kukin kal yak bukusiwyoub sod, amsinap kamnat. Nag kweitan amsinap waseg bukukwalouw, nag.

¹¹Kukin bukwamliw soum, igaw tadadub yak. Dadub waseg kuninoun. Ta-mawan bukukin maked, peinan dadub bo isilbwed matam.

¹²Nalel sinap towen pinamiy yakamiy gamagal. Peinan yagan towen waseg bo inumlev amisinap kalbaleb.

¹³Nalel sinap towen pinamiy tamumwey yakamiy. Peinan nukukwakins mtowen wanamug nises.

Nalel sinap towen pinamiy tabwabwat yakamiy. Peinan towen takalbaleb iyakwaneimiy, nag. Bo kutawtouns.

Nalel sinap towen pinamiy gamagal yakamiy. Peinan nukukwakins Tamads.

¹⁴Nalel sinap towen pinamiy tamumwey yakamiy. Peinan nukukawakins mtowen wanamug nises.

Nalel sinap towen pinamiy tabwabwat yakamiy. Peinan nukutawtouns. Yowbad sinapun nises wasigeis yakamiy. Towen takalbaleb iyakwaneimiy, nag. Bo kutawtouns.

¹⁵Awoum kwalpwakit ven watinow youdanan waseg; awoum. Kal yakamiy bikalpwakit ven watinow waseg, ta-mawan bikalpwakit Tamads waseg.

¹⁶Ven watinow youdanan meinoy neim ven watinow. Sinap tasiyas mamagina, aveiyag woun sivanan, o aveiyag mat sivanan, o kayyapam mwamov waseg. Sinap tasiyas nag inoy neim Tamads waseg, nag.

¹⁷Ven watinow igaw beikous, mo beikous kalpwakit-nen; tage kavel yakoum bukwablaway nanon Yowbad, bukuses bukusigeg.

Tapiyavein Kelis

¹⁸Gamagal yakamiy, bo talivatus nakabiyokous tut. Nukuliganes tapiyavein Kelis mo bisap. Nagein gog babawa isaps tapiyaveins Kelis. Mapun takakins nakabiyokous tut nitalivatus.

¹⁹Tasiyas meinoy niweis wasigeis yakids, tage nag sidayas moundid, nag. Tobwag gamag tasiyas. Magat moundida sidayas tasiyas nag bilisaweids. E, bo nilisaweids, mapuna takakins tobwag gamag tasiyas.

²⁰Yakamiy nag mawan tasiyas, nag. Peinan Yowbad Kululuwan niwekeimiy mo kukwakins youd babaw.

²¹Nalel sinap towen peinan nag tatagouwaw yakamiy.

Kukwakins gog sinap moundid; o kukwakins nag kweitan yaweid beinoy sinap moundid waseg, nag.

²²Kal mtowen tayyaweid? Adok towen bilivan bilana, “Yeisuw nag Mesay Kelis.” Mtowen tapiyavein Kelis, ipiyev livanen Tamads son Natun.

²³Kalisiy bipiyaves Yowbad Natun, Tamads nag ises wasigeis tasiyas. Kal yak bukutam waseg Yowbad Natun, Tamads nises waseg yakoum.

²⁴Sinap wanamug nukuliganes, sinap towen bweina bises wasigeis yakamiy, mo bukusesus bwein simiyas Tamads son Natun.

²⁵Mtowen bo bisekeids mwamovads nag beikous, peinan bo ilivnek mawan.

²⁶Livanen tasiyas takatidividavs bo nalel, neikous.

²⁷Tage Kululuwan Yowbad niwekeimiy, nises wasigeis yakamiy. Nag ivag sivinamiy gamag teitan bikatimlakeimiy, nag. Kululuwan Towne bikatimlakeimiy sinap babaw waseg. Mtowen ansinap moundid; nag biyaweid, nag. Simiy Towne bukusesus bwein, mawan nidibakeimiy.

Yowbad nitun

²⁸Budag yakamiy, tut nagein kadiloka Kelis waseg bukusesus. Igaw beiyum bimekeids mo bitakapwapouts; awoum beivag admwasins mtowen wamatan.

²⁹Magat bukukwakins mtowen ansinap didumwal, mo bukukwakins nitun babaw asinap didumwal.

3 ¹Tamads nasiwayoub singay avakaein wasigeis yakids peinan idokeids nitun tatonen yakids. E, nitun tatonen yakids. Mapuna ven watinow gimgilis nag ikakins kalisiy yakids; peinan nag ikakins Tamads.

²Sigwey yakamiy, tut towen Yowbad nitun yakids; o nag bitakakins aveiyag bitamlavags tut wanakougwaw. Misinaka takakins igaw daGuyaws beiyum beim, yakids mo bitamlavags mawana towen, peinan bitakines ankakin tonen.

³Kal yak bukunamis silmanin nakabeiyum townen, mo bukuvnas ansinap beibwein; peinan Townen ansinap bwanabwein.

⁴Kal ansinap kalbaleb mo bisiplev Yowbad nakaleiwag. Tasiplavein Yowbad nakaleiwag ansinap kalbaleb.

⁵Kukwakins Kelis nisap vagan kid sinap kalbaleb bikow binow, bilev. Townen nag ivag ansinap kalbaleb, nag.

⁶Kal yakamiy bisesuna Kelis waseg, nag beivag ansinap kalbaleb; nag. Townen gog kavel ansinap kalbaleb nag ikin Kelis, o nag ikakin townen, nag.

⁷Budag yakamiy, awoum gamag mwasanin bikatidavimiy; awoum. Kal ansinap didumwal, tadidumwal townen. E, Kelis ansinap mawan, didumwal.

⁸Kal townen takalbaleb, mamagina Seitan angamag; peinan misikena takalbaleb townen Seitan. Tage Yowbad Natun isap neim vagan kid bigulek Seitan nakaleiwag.

⁹Kal nakabsilamaw waseg Yowbad nag beivag ansinap kalbaleb, nag. Peinan sinap kweivaw wanuwan nises. Ta-mawan beivag ansinap kalbaleb, peinan mwamovan nakabsilamaw Yowbad waseg.

¹⁰Mapuna takakins kalisiy Yowbad nitun, o kalisiy Seitan nitun. Kal nag ivag ansinap didumwal nag meinoy neim Yowbad waseg, nag; o kal nag isiwyoub bwadan nag meinoy neim Yowbad waseg, nag.

Kusiwayoubs simsimiyas wasigeis

¹¹Bulagan kweiboug nitaliganes mamagina:

“Kadiloka bitasiwayoubs sidsidayas wasigeis.”

¹²Awoum beivag adsinaps mawan Seitan angamag townen Kayin, peinan tawayin bwadan tonen. Aveiyag wawun iweiy? Peinan Kayin ansinap kalbaleb, tage bwadan ansinap bwanabwein.

¹³Sigwey yakamiy, ven watinow gimgilis mwasanin bikamliweimiy, tage awoum bisunasun ninoumiy.

¹⁴Yakids gog tasiwayoubs wasigeis sidayas, mapuna takakins nitalisawes kanig, mwamov nitabanes. Kukin kalisiy nag bisiwyoubs sisiyas wasigeis, tasiyas igawa son kanig nisesus.

¹⁵Kukin kalisiy bikamliwes sisiyas, tasiyas mamagina tawayins gamag. Takakinsa tasiyas tawayins gamag nag ivag mwamoves bises bisigeg, nag.

¹⁶Sinap townen yagan siwayoub takakins peinan Kelis nitam won tonen, ikanig peinads yakids. Kadilok bitatames wouds yakids pines sidayas.

¹⁷Kukin kal navavag sam, o ikin son tasimav teitan, tage nag bileb son, tabta Yowbad nasiwayoub nises waseg gamag townen? Adok nag.

¹⁸Budag yakamiy, awoum wudoumiy mav bisiwyoub. Tage kadiloka kusiwayoubs amisinap moundid waseg.

Takapwapouts wamatan Yowbad

¹⁹Bitasiwayoubs adsinaps moundid waseg mo bitakakins kamounid nises wasigeis yakids. Nag beivag admwasins wamatan Yowbad, nag.

²⁰Magat tadokes adsinaps kalbaleb mo beivag admwasins wamatan Yowbad; tage Yowbad bikaleiwag; nanoud tatoneid awoum bikaleiwag. Peinan Yowbad sinap babaw ikakin.

²¹Budag yakamiy, magat nag beivag admwasins, mo bitakapwapouts wamatan Yowbad.

²²E, bitanitougs waseg Yowbad mo bitayousis youd tasiyas babaw, peinan tavnases nakaleiwag, o peinan dakawotets mawan townen sivinan.

²³Nakaleiwag townen, bitasimounids livanen Natun, Yeisuw Kelis waseg, o bitasiwayoubs sidayas wasigeis. E, Yeisuw nakaleiwag mawan.

²⁴Kal yak bukuvnas nakaleiwag, mo bukuses waseg Townen, o Townen waseg yak. O Kululuwan Townen nisekeids mo bikatimlakeids vagan bitakakins mtowen nises wasigeis yakids.

Kululuwan Yowbad o Kululuwan Tapiyavein Kelis

4 ¹Budag yakamiy, awoum bukusimounids kululuwan babaw wasigeis, awoum. Tage bukuyakwanes mo bukukines meinoy nimeis Yowbad waseg, o nag. Peinan tayyaweids babaw nisaps wadaban pwepway, mamagina palopits tasiyas; tage ikatidavis gamag.

²Kuyakwanes mawan. Kukin kal bilivan, bilana, “Mesay bo imlavag gamag ven watinow, yagan Yeisuw,” kululuwan townen moundid meinoy neim Yowbad waseg.

³Tage kal nag bisimounid waseg Yeisuw, kululuwan townen nag meinoy neim Yowbad waseg, nag. Townen gog tapiyavein Kelis. Kweiboug nukuliganes mtowen beim. E, tut townen bo isap wadaban pwepway, townen tapiyavein Kelis.

⁴Nitug, Yowbad angamag yakamiy, nukutakayways wasigeis tasiyas, peinan Townen waseg yakids bo itawtoun waseg mtowen sisiy ven watinow gimgilis.

⁵Gamag tasiyas siven watinow, mapuna illivans livanen ven watinow, o ven watinow gimgilis iliganes ages.

⁶Tage Yowbad angamag yakids. Kukin kal ikakin Yowbad mo biligen aygads; tage tapiyavein aygads tasiyas nag inoyes Yowbad inaked. Bitakin asisinap mo bitakakin aw-kululuwan moundid, awkululuwan yaweid.

Yowbad siwayoub wawun

⁷Sigwey, kadiloka bitasiwayoubs sidsidayas wasigeis, peinan siwayoub meinoy neim Yowbad waseg. Kukin bitanoy bitem Yowbad waseg, o bitakakin Yowbad, mo bitasiwayoub.

⁸Kukin kal nag isiwayoub, townen nag ikakin Yowbad, peinan Yowbad siwayoub wawun.

⁹Yowbad nikatimlakeids nasiwayoub wasigeis yakids, peinan nikayeb Natun anmwānet-wan, neim watinow vagan kid biyamoveids.

¹⁰Mapuna takakins siwayoub wawun. Nag peinan tasiwayoubs waseg Yowbad; nag. Tage Yowbad nisiwayoub wasigeis yakids, to nitam Natun mamagina lun bulukwan, adsinaps kalbaleb silmanin.

¹¹Sigwey, Yowbad nisiwayoub wasigeis yakids, kadiloka bitasiwayoubs mawan sidsidayas wasigeis.

¹²Nag kweitan tut gimgilitoun watinow ikin Yowbad, nag. Tage bitasiwayoubs sidsidayas wasigeis, Yowbad sods mo bitasesus, o nasiwayoub moundid biton wasigeis yakids.

¹³O peinan kululuwan tonen nisekeids, mapuna takakins nitasesus waseg Townen, o Townen waseg yakids.

¹⁴Nakakin, mapuna kadibakeimiy o kukwakins Tamads nikayeb Natun, neim watinow, vagan kid bikatinabweids, ven watinow gimgilis yakids.

¹⁵Kal yakamiy bisimounid, bilana, "Moundid Yeisuw Yowbad Natun," Yowbad mo bises waseg townen, o townen waseg Yowbad.

¹⁶Mapuna takakins o tasimounids waseg Yowbad inasiwayoub wasigeis yakids.

Yowbad gog siwayoub wawun. Kal yak bukusiwayoub-wan, bukusesuna waseg Yowbad, o Yowbad waseg yak bises.

¹⁷Kukin siwayoub moundid biton wasigeis yakids, mo bitakapwapouts yam townen igaw Yowbad bikatukin ven watinow gimgilis wasigeis. Peinan yakids mawana Townen, ven watinow waseg.

¹⁸Towen tasiwayoub nag beivag anpwayat. Kukin siwayoub biton wasigeis yakid, mo beikous adpwayats. Tage kukin Yowbad bikatimop adsinap mo beivag adpwayat, o siwayoub nag iton wasigeis yakids.

¹⁹Yakids tasiwayoubs peinan wanmugwana Townen nisiwayoub wasigeis yakids.

²⁰Kukin kal bilivan bilana, "Yey asiwayoub waseg Yowbad," tage bikamliw son, singay tayyaweid townen. Son ikin, tage Yowbad nag ikin. Kukin nag isiwyoub son, amawan bisiwyoub Yowbad? Adok nag.

²¹E, nakaleiwag townen; kukin kal bisiwayoub waseg Yowbad, kadiloka bisiwayoub son waseg.

Simounid bitakayway ven watinow waseg

5 ¹Kalisy yakids tasimounids peinan Yeisuw Mesay Kelis, yakids Yowbad angamag; mamagina Yowbad nitun yakids. Kukin kal bisiwayoub waseg Tamads mo bisiwayoub Yowbad nitun wasigeis.

²Mapuna takakins tasiwayoubs Yowbad nitun wasigeis, peinan tasiwayoubs waseg Yowbad, o tavnases nakaleiwag.

³Amawan bitasiwayoubs waseg Yowbad? Adok bitavnases nakaleiwag. Tage nag moumouvit nakaleiwag tonen, nag.

⁴⁻⁵Kukin dakabsilamaws Yowbad waseg, mo bitakayways ven watinow sinapun waseg. Amawan bitatakayways? Adok peinan

tasimounids Yowbad Natun, mtowen Yeisuw. Nag kwayuwein ked waseg bitatakayways, nag.

Livanen Yowbad Natun

⁶Mtowen neim yevagam son buyav waseg, yagan Yeisuw Kelis. Nag misinaka yevagam, nag. Yevagam son buyav. Livanen sinap towen Yowbad Kululuwan ilivan; anilivan moundi-wan.

⁷⁻⁸Asteitoun takaweins livanen Yeisuw, teitan Yowbad Kululuwan, kwayuwein yevagam, kwatounun buyavin; asilivan bo ilatan katanok-wan.

⁹Kukin bitaliganes gamag asilivan, peinan tawtoun, kadiloka bitaliganes-vak Yowbad anilivan, peinan Tatawtoun singay; o Yowbad anilivan bo nikatimlakeids Natun Yeisuw livanen.

¹⁰Kal yak bukusimounid waseg Yeisuw, bukusimkwen wakateim moundi Yowbad Natun towen. Kukin nag bukusimounid waseg Yowbad, mo bukudok tayyaweid Towen Yowbad; peinan nag kusimounid anilivan, livanen Natun tonen.

¹¹Yowbad anilivan mamagina, “Asekeimiy mwamovamiy nag beikous, Natug Yeisuw waseg.”

¹²Kukin Yowbad Natun bises waseg yak, mwamovam bukuban; kukin gog nag, bo nag.

Bitakakins mwamovads bises bisigeg

¹³Sinap towen bo nalel neiw, vagan bukukwakins mwamovamiy bises bisigeg; magat bukusimounids waseg livanen Yowbad Natun.

¹⁴Towen peinan takapwapouts wamatan Yowbad; o kukin aveiyag bitantougis, o nanon mawan, mo biligen.

¹⁵E, bitakakins Yowbad biligen dakanitougs, mo takakins igaw bo bisekeids youd towen.

¹⁶Magat yak bukukin bwadam ansinap bigeg, o sinap towen nag silmanin kanig, bweina kunitoug waseg Yowbad, peinan bwadam; Yowbad mo bisek mwamovan, peinan nag ivag ansinap kalbaleb silmanin kanig. Awoum kunitoug vagan Yowbad bileb tayuwein kavel kalbaleb ansinap silmanin kanig; awoum.

¹⁷Aveiyag kalbaleb, sinap towen igeg; tage sinap kalbaleb nises nag silmanin kanig.

¹⁸Takakins Yowbad angamag yakids nag ivag adsinaps kalbaleb, peinan tavnases adsinaps, o towen takalbaleb nag biyousids, nag.

¹⁹Takakins Yowbad angamag yakids; tage towen takalbaleb ikaleiwag ven babaw gimgilis wasigeis.

²⁰Takakins Yowbad Natun neim, adsinaps nisekeids vagan bitawtusis Tadidumwal towen. E, tasesus waseg Towen Tadidumwal, o waseg

Natun Yeisuw Kelis. Mtowen Yowbad moundid; Towen waseg mwamovads bitabanes nag beikous.

²¹Budag yakamiy, kadiloka bukupiyaves tobwag yowbad.

Yey Yon.